



Mas-chalch

Fögl d'infuormaziun official dal cumün da Scuol

Infuormaziuns da la suprastanza cumünala

Taxas da sepultura

In connex culla ledscha da sunteri ha re-laschè la suprastanza l'uorden da las taxas:

Taxas d'organisaziun

Pauschala unica per l'organisaziun tras il cumün 110.00

Taxas da sepultura

Interraments

- a) personas cun domicil da dret civil a Scuol 550.00
b) personas cun ün oter domicil da dret civil 1100.00

Sepulturas d'urna

- a) personas cun domicil da dret civil a Scuol
– sepultura d'urna singula in üna fossa d'urna singula, in üna fossa d'interrament existenta o in üna nischa da paraid 330.00
– sepultura d'urna singula in üna fossa cumünaipla 220.00

b) personas cun ün oter domicil da dret civil

- sepultura d'urna singula in üna fossa d'urna singula, in üna fossa d'interrament existenta o in üna nischa da paraid 660.00
– sepultura d'urna singula in üna fossa cumünaipla 440.00

Quist uorden da las taxas as rechatta eir sülla pagina d'internet dal cumün (www.scuol.net/fanestrigl electronic).

Forza electrica: Taxa a favor da la comunità

La ledscha d'energia dal cumün da Scuol dals 26 marz 2017 (l'artichel 1 al. 2) pretenda cha la radunanza cumünala fixa minch'on la taxa per l'on davo, quai aint il rom tanter 0 e 4 raps per ura kilowatt.

La radunanza cumünala dals 26 gën ha decis da laschar la taxa a favor da la comunità eir per l'on chi vain sco fin qua, voul dir 1.5 raps per ura kilowatt.

Reservat da biosfera UNESCO Engiadina Val Müstair

Label

Il Reservat da biosfera Engiadina Val Müstair ha surgnü als 13 gën 2017 definitivmaing il label da l'UNESCO. Quai davo cha'l cumün da Scuol vaiva decis dal 2015 da d'vantar partenari da cooperaziun e da s-chaffir üna zona circumdanta (zona da chüra e zona da svilup) al nord dal parc.

I d'eira intschert scha l'UNESCO detta il label, siond cha'ls cumüns da S-chanf e da Zernez vaivan refusà da's participar, uschè cha la zona circumdanta intuorn il Parc nazional nun es cumpletta. Tant plü grond es uossa il plaschair chi'd ha funcziunà!



Il label «Reservat da biosfera» es cuntshaint in tuot il muond. Tals reservats sun regiuns da model cul böt d'ün svilup persistent. I nu va simplamaing per proteger la natüra, dimpersè per integrar eir las activitats dals umans. Actualmaing existan passa 670 reservats da biosfera cul label da l'UNESCO in 120 pajais, in Svizra daja duos, il se-guond es quel da l'Entlebuch (chantun da Lucerna).

Per ulteriuras infuormaziuns: www.biosphaerenreservat.ch

Exposiziun: «Utschels chi cuan per terra – üna spezcha fascinant»

L'existenza da quists utschels (p.ex. il praderin brün) dependa fermamaing dal möd da la cultivaziun agricola. In Engiadina Bassa e Val Müstair daja amo territoris cun blers exemplars. In bleras otras regiuns da la Svizra però van inavo las populaziuns considerabelmaing.

L'exposiziun aint il local da cultura dal Bogn Engiadina Scuol infuorma da maniera divertenta e cun staziuns interactivas. Ella es adattada eir per uffants e giuvenils. Ella düra dals 2 lügl fin als 4 avuost ed es averta mincha di.

La vernissascha ha lö als 2 lügl a las 17.00. Davo ün referat dal biolog dr. David Jenny offrisha il Reservat da biosfera UNESCO Engiadina Val Müstair ün apéro.

I vegnan sportas eir visitas guidadas (adüna mardi, gövgia e dumengia da las 16.00 fin las 19.00). Als 11 ed als 18 lügl han lö excursiuns, ils partecipants es reunischan a las 13.30 pro la fermativa dal bus Bogn Engiadina Scuol.

Per detagls: www.scuol.net

Excursiun Val Plavna

Suot il titel «Particularitats botanicas e da la cuntrada aint il Reservat da biosfera UNESCO Engiadina Val Müstair» ha lö als 8 lügl ün'excursiun in Val Plavna. Las manadras sun Constanze Conradin (botanica) ed Angelika Abderhalden (ecologa da cuntrada e manadra da gestiun dal Reservat da biosfera UNESCO Engiadina Val Müstair).

Lö ed urari da reuniun: 8.45 Tarasp Fontana (fermativa da l'auto da posta). Finischun ca. a las 16.00 a Tarasp Fontana.

Per detagls: www.scuol.net

Arrandschamaints

Sent: Concert «Still und unendlich weit»

1. lügl, 20.15, baselgia: Coro Cantarina, Ils Fränzlis da Tschlin, Bärghlüemli Lüttau. Il concert cumbinescha ün coro classic, ün quartet dubel da jodladers ed ils Fränzlis da Tschlin e cumpiglia eir üna nouva cumposiziun da Domenic Janett. Entrada: 25 francs.

Guarda: Inauguraziun da la nouva Senda d'Uorsin

19 lügl: 10.00 e 11.00 spassegiadas cun guida; 10.30 fin 13.00 aperitiv sü Plan dal Növ; 14.00 pled festiv d'ün rapreschantant dal cumün. La festa cumpiglia eir ün marchà ed ün'ustaria (Società da duonnas Guarda) e düra fin las 17.00. Divertimaint musical: duo «Peder e Benedict». Auto da posta gratuit davent da Guarda Staziun, plazzas da parcar gratuitas sül parkegi «Valletta».

Ardez: Stabilimaints cun importanza istorica (referat)

26 lügl / 2 avuost, 19.00 fin 20.15; chasa cumünala. Jonpeider Strimer preschainta stabilimaints ed ogets cun importanza istorica e quinta da la «Via imperiala», l'unica via da colliaziun tras l'Engiadina Bassa fin dal 1867. In seguit daja ün apéro offri da la Pro Ardez. Arrandschamaint gratuit, i nu fa dabsögn da s'annunzchar.

Per infuormaziuns: telefon 079 610 51 03 / jpstrimer@bluewin.ch

Festa nazionala dals 1. avuost

La festa nazionala vain celebrada eir quist on da maniera tradiziunala. Il program detaglià per mincha fracziun as chatta sülla pagina d'internet www.scuol.net.



Val Plavna

Fotografia © SNP, Hans Lozza

Uffizi da fabrica

Reciclar butiglias da PET



Butiglias da PET per bavron-das sun fich praticas e perquai omnipreschaintas – be in Svizra vegnan vendüdas mincha on passa 1.5 milliardas! La Svizra es eir statta ün dals prüms pajais chi'd ha introdüt ün recicladi serrà, q.v.d. chi vegnan fattas our da butiglias dovradas dacheu novas butiglias. Quai però funcziuna be culla disciplina toccanta pro'l ramassamaint. Aint ils

recipiants blau-gelgs respectiv as das-cha büttar **be butiglias da bavron-das**. Butiglias chi cuntgnivan alch oter, p. ex. öli, aschaid, lat, jogurt, shampoo, mezs da pulir etc. consistan suvent dad oters materials e pericliteschan perquai la reütisaziun. I dà fingià lös per allontanar talas butiglias separadamaing, inschinà toccan ellas aint il sach da las immundizchas.

Il logo pel PET-Recycling as rechatta per regla sülla butiglia.

Il recicladi serrà dal PET es fich important, na be per diminuir la quantità da las immundizchas, dimpersè eir per schaniar resursas na regenerablas. La prüma materia per prodüer PET es öli mineral obain gas natural! Cun reciclar il PET as poja eir spargnar ca. 50% energia in congual culla produziun da PET nouv.

Per infuormaziuns plü detagliadas: <http://www.petrecycling.ch/de/sammeln/was-sammeln>

Il Mas-chalch dal cumün da Scuol cumpara üna jada al mais. Ediziuns veglias as poja leger sülla pagina d'internet dal cumün www.scuol.net.

Prosma ediziun: **27 lügl 2017**

Organisatuors d'arrandschamaints pon inoltrar publicaziuns fin il plü tard venderdi **ils 21 lügl** a mezdi pro lingua@scuol.net

Reglas

1. No publicchain be arrandschamaints chi'd aintran per e-mail.
 2. L'arrandschamaint sto avair üna tscherta importanza per la generalità.
 3. La redacziun decida s'vess davart la publicaziun e's resalva eir il dret da scurz-nir ils texts inoltrats.
- Ils cuosts da la publicaziun surpiglia il cumün da Scuol.